

Siunnersuut uunga: Imeruersaatit qiimmassaatinik akullit (energidrik) inunnut 18-it inorlugit ukiulinnut tuniniarnissaannik sassaalliutiginnissaannillu inerteqquteqarneq, kiisalu imeruersaatit qiimmassaatinik akullit allagartalersorneqartarneri ussasaarutigineqartarnerilu pillugit Inatsisartut inatsisaat nr. xx, xx. xxxxx 2012-imeersoq.

(Peqqissutsimut Naalakkersuisumit saqqummiunneqartoq)

pillugu

Ilaqutariinnermut Peqqissutsimullu Ataatsimiititaliap

ISUMALIUTISSIISSUTAA

siunnersuutip aappassaaneerneqarneranut saqqummiunneqartoq

Ataatsimiititaliap suliarinninnerani ilaasortaapput:

Inatsisartunut ilaasortaq Olga P. Berthelsen, Inuit Ataqtigiit, siulittaasoq
Inatsisartunut ilaasortaq Debora Kleist, Inuit Ataqtigiit, siulittaasup tullia
Inatsisartunut ilaasortaq Isak Hammond, Inuit Ataqtigiit
Inatsisartunut ilaasortaq Justus Hansen, Demokraatit
Inatsisartunut ilaasortaq Knud Kristiansen, Atassut
Inatsisartunut ilaasortaq Ruth Heilmann, Siumut
Inatsisartunut ilaasortaq Malik Berthelsen, Siumut

Siunnersuut UPA2012-ip ingerlanerani ulloq 13. april 2012 siullermeerneqareermat siunnersuut misissuataarsimavaa.

Siunnersuutip imarisaa siunertaalu

18-it inorlugit ukiulinnut imeruersaatinik qiimmassaatinik akulinnik nioqquteqarneq sassaallertarnerlu inatsisissatut siunnersuummi inerteqqutiginiarneqarput. Imeruersaatit qiimmassaatinik akullit najooqqagassatut kaffip eqeernartuanik akulittut nassuiarneqartarnissaa siunnersuutigineqarpoq, aamma kaffip eqeernartuanik ataatsimut tamaat akua literimut 150 mg qaangersimassanngikkaa.

Siunnersuutigineqarportaaq inerteqqut pillugu suliffeqarfimmi neriniartarfimmiluunniit erseqqissumik allagartaliisoqartarnissaa. Aamma siunnersuutigineqarpoq imeruersaatit qiimmassaatinik akullit kaffip eqeernartuanik annertuumik akoqarnerannik ersarissumik

kalaallisut qallunaatullu mianersoqqussummik allagartalerneqartassasut. Aamma imeruusaatinik qiimmassaatinik akulinnik tunisassiat meeqqanut, inersimasunut naartusunullu annertuallaamik imernerisigut ulorianartuunerannik nalunaaqutserneqartassapput. Kiisalu aamma siunnersuutigineqarpoq imeruusaatit qiimmassaatinik akullit ussassaarutigineqarnissaat inerteqqutaassasoq.

Siunnersuutip Inatsisartuni siullermeerneqarnera

Siunnersuut UPA2012-imi siullermeerneqarpoq. Inuit Ataqtigiit Siumullu inuiaqatigiinni nalinginnaasumik peqqinnissaq aallaavigalugu siunnersuummik tapersersuipput. Imeruusaatilli qiimmassaatinik akullit ussassaarutigineqarsinnaanerannik siunnersuutip tunngasortaa Siumup tapersersinnaangilaa, taamatut inerteqquteqarniarneq nioqqutissat taamaaqataanik ajornerungaarnerusunilluunniit kinguneqarsinnaasut ussassaarutigineqarsinnaaneratt eqqarsaatigalugu.

Demokraatit Atassutillu siunnersuut tapersinngilaat. Imeruusaatinik qiimmassaatinik akulinnik atuivallaarnerup kingunipilorisinnaasai partiit marluullutik ilisimaaraat, isumaqarlutilli ajornartorsiummik akiuinarneq nalinginnaasumik paasisitsiniaanikkut pisariaqartoq, assersuutigalugu inerteqquteqarnermut taarsiullugu pisiniarfinni allagartalersuinikkut.

Saaffiginnissutit

Ataatsimiititaliaq ulloq 9. november 2012 atuarnerup nalaani meeqqanut atuartunut imeruusaatinik qiimmassaatinik akulinnik tuniniaasannginissamik nammineq piomassutsimik isumaqatigiissuteqarnermut peqataasut sinniisaannik sassartitsivoq. Nammineq piomassutsimik isumaqatigiissummut peqataasut Kommuneqarfik Sermersooq, CSR Greenland Sulisitsisullu ulloq 9. januar 2012 atuarnerup nalaani meeqqanut imeruusaatinik qiimmassaatinik akulinnik tuniniaasannginissaq siunertaralugu paasisitsiniaanermik aallartitsipput. Tamatuma saniatigut pisiniarfinnut allartanik nivinngagassanik suliaqartoqarpoq nivinngaassuisoqarlunilu erseqqissumik nalunaarlugu imeruusaatit qiimmassaatinik akullit meeqqanut, naartusunut inunnullu koffeinimik sapigalinnut ulorianarsinnaasut, soorlu aamma atuarnerup nalaani imeruusaatinik qiimmassaatalinnik meeqqanut tunisisoqaqqusinnginneq erseqqissarneqartoq.

Isumaqatigiissummut peqataasut isumaqarput atuarnerup nalaani imeruusaatinik qiimmassaatalinnik meeqqanut tunisisoqartannginissaanik nammineq piomassutsimik isumaqatigiissuteqarsimaneq kissaatigineqartutut sunniuteqarsimasoq. Atuarfiit attaveqarfigereerlugit kommunimi peqqissutsimut pinaveersaartitsinermullu immikkoortortamit oqaatigineqarpoq atuarnerup nalaani imeruusaatinik qiimmassaatalinnik tuniniaaqqusinnginneq atuartut ataqqigaat, siusinnerusukkullu meeqqanik atuarnerup nalaani imeruusaatinik qiimmassaatalinnik atuineq annikillisimasoq.

Ataatsimiititaliap siunnersuummik suliarinninnera

Siunnersuutip siullermeerneqarnerani isumaqatigiinnngissutit tunngavigalugit siunnersuutip sapinngisamik annertunerpaamik isumaqatigiissutigineqarnissaa siunertaralugu periarfissanik assigiinngitsunik ataatsimiititaliaq qulaajaasimavoq.

Naalackersuinikkut isumaqatigiinniarnertit ilaasortat partiillu akornanni isumaqatigiittoqarneranik inerneqanngillat, tamannalu siunnersuummut inassutinit takuneqarsinnaavoq.

Siunnersuutip aningaasatigut kingunerisassai

Siunnersuutip piviusunnngortinneqaruni aningaasatigut kingunerisassai siunnersuummut nalinginnaasumik nassuiaatini allaaserineqarsimapput. Siunnersuutip aningaasatigut kingunerisassai pillugit taaneqartut ataatsimiititaliap tusaatissatut tiguai.

Ataatsimiititaliap inassuteqaatai**Inuit Ataatiigiit**

Siunnersuutip siulleermeerneqarnerani partiip oqaaseqaatai Inuit Ataatiigiinniit attatiinnarneqarput, isumaqarlutillu siunnersuummik saqqummiussinermikkut imeruersaatit qiimmassaatinik akullit pillugit Inatsisartunit siusinnerusukkut aalajangiunneqarsimasunik oqaluuserineqarsimasunillu Naalackersuisut eqqortumik malinnittut.

Siunnersuut maanna ilusimisut iluseqartoq akuerineqassasoq Inuit Ataatiigiit inassutigaat.**Siumut**

Miserratiigissanngilarput UPA 2012/35-ip Inatsisartuniit Naalackersuisunut suliaakkiutigineqarneranut Siumumiit akuerseqataanitsigut peqataasimagatta.

Isertuutinnngisaannarparpulli pisequsaannginnissaminik 18-inut ukiuliiniarneq ingasagigaluarlutigu allatut ajornartumik akuersisariaqarsimanerput. Suliap ingerlanerani kissaatigisimagaluarparput pisisinnaasut ukiuisa appartinneqarsinnaanissaanut partiinit allanit isumaqatissarsisinnaanissarput, ajoraluartumilli tamanna pisinnaasimangilaq.

Inuusuttut 16-17-inik ukiullit timimikkut ima inersimatigilereertarput nammineersinnaalersimallutik ingerlariaqqiffiusumik ilinniakkamik aallartitsisimasarlutik, suliffeqalersimallutik aammalu timersuutininik ilungersunartunik aqqissuussinernut peqataasalersimasarlutik. Tamakkua pingaarnerusumik tunngavigalugit isumaqarpugut

inuusuttuaqqat 16-17-inik ukiullit imeruusaatinik qiimmassaatitalinnik inatsisitigut piseqqusaannginnissaat ingasappallaaluatsiartoq. Taamaattumik aalajangiinissatsinnut uummaterput assortuinnarumanatigu piseqqusaannginnermut 18-inik ukioqalereersimanissamut killiliiniarneq itigartitsissutigissavarput.

Tamanna tungavigalugu siunnersuut itigartinneqassasoq Siumup inassutigaa.

Demkoraatit aamma Atassut

Imeruusaatinik qiimmassaatitalinnik annertuaallaamik atuinerup sunniutigisinnaasai pitsaanngitsut Demokraatinit aammalu Atassummit arajutsisimaneqanngillat, partiilli Kommuneqarfik Sermersuup, CSR Greenlandip aammalu Kalaallit Nunaanni Sulisitsisut Peqatigiiffiata ataani niuertarfiit arlalissuit imeruusaatinik qiimmassaatitalinnik atuarnepup nalaani meeqqanut pisitsitinnnginnissamik namminneq piumassusertik naapertorlugu inuiaqatigiinnut akisussaassuseqarlutik isumaqatigiissutaat tatigaa.

Inerteqquteqarnissamut taarsiullugu pinaveersaartitsinerit aammalu innuttaasunut paasisitsiniaanerit nalinginnaasut ingerlanneqarnissaat Demokraatinit aamma Atassummit kissaatigineqarnerupput.

Imeruusaatit qiimmassaatitalit pillugit siusinnerusukkut ajornartorsiutaasoq peqatigiilluni isumaqatigiissuteqarnikkut aaqqinneqarsimasoq imaluunniit killilerneqarsimasoq paasinarsivoq, taamaattumillu inatsisitigut maleruagassiornissaq pisariaqarani.

Inerteqquteqarneq aqputigalugu naalagaaniarnermut taarsiullugu taanna aqputissaavoq eqqortoq.

Angajoqqaat, meeqqat atuarfiullu pitsaasunik nerisaqarnissaq imigaqarnissarlu pillugit oqaloqatigiinnerisa ingerlaqqinnissaat Demokraatit aamma Atassutip kaammattuutigaat.

Tamanna tungavigalugu siunnersuut itigartinneqassasoq Demokraatit aamma Atassutip inassutigaa.

Taamatut oqaaseqarluni isumaliutissiissummilu taaneqartutut paasinniluni ataatsimiititaliap matunuuna siunnersuut aappassaaniigangortippaa.

Olga P. Berthelsen,
Siulittaasoq

Debora Kleist

Isak Hammond

Justus Hansen

Knud Kristiansen

Ruth Heilmann

Malik Berthelsen